

四庫全書

史部

欽定四庫全書

史部

皇朝文獻通考卷四十三

內閣中書_臣實汝翼覆勘

總校官中書_臣孫溶

欽定四庫全書

皇朝文獻通考卷四十三

國用考 五

漕運

漕運規例

漕糧各省原額正兌米三百三十萬石改兌米七十萬石今除折改及歷年荒闕開墾報銷不足原額外實徵正兌米二百七十五萬一千二百八十三石

改兌米五十萬一千四百九十石各有奇

會典則例據乾隆十

八年奏銷冊約舉其數今採入按每年應有蠲緩有定額而無定數正兌改兌外有加

徵以待耗闕者曰正耗米數以省之遠近為多寡正

兌每石正耗四斗至三斗五升改兌四斗至一斗七

升各有差有額徵之漕糧而折徵者曰永折米江蘇

安徽山東河南湖北湖南共徵米三十六萬一百八

十六石六斗六升有奇每石折徵銀八錢至五錢五

分有差有改徵漕糧而折徵者曰灰石折米江蘇浙

江應徵米共三萬四千四百四十石遇閏加徵二千八百七十石每石連耗折徵銀一兩六錢

白糧江蘇蘇州松江常州三府太倉州原額十五萬四百三十八石四斗七升除改徵漕糧外實徵六萬九千四百四十七石浙江嘉興湖州二府原額六萬六千二百石除改徵漕糧外實徵三萬五百五十三石耗米每正額米一石江南加徵三斗浙江四斗共三萬四千五百八十二石九斗五升

有奇經費江蘇浙江共徵銀二十三萬二千六十
一兩八釐米五萬七千五百四十八石九斗九升
四合

小麥河南正兌改兌共八千一百十九石四斗加
耗與米同

黑豆山東河南正兌改兌共十萬五千三百二十
三石三斗五升有奇加耗與米同

隨漕欸目曰輕齎曰易米折銀曰官軍行月曰贈

貼曰紅駁曰蓆木板竹各省共徵銀一百八十五萬三千六百兩遇閏加徵紅駁銀三百兩米六十一萬七千八百七十六石麥萬九千六百八十二石豆五百三十二石各有奇

水次六倉江南江寧倉徵米淮安鳳陽二倉徵銀米麥徐州倉徵銀麥豆山東德州臨清二倉徵銀米共徵銀二十六萬三千六百二十六兩米七萬二千二百四十六石麥五萬四千三百八十三石

豆四千三十七石各有奇

順治九年定漕糧官收官兌徵贈貼銀米給運軍
漕糧向係軍民交兌軍強民弱每多勒索至是定
為官收官兌酌定贈貼銀米民輸官給浮費悉除
十七年令折徵灰石米解部撥支舊例漕糧內有
給軍辦運灰石之米旋停辦灰石米仍運通至是
始令折銀解戶部聽工部按年支取備用

十八年禁折徵漕糧毋得以兌漕為名價外苛索

康熙元年

諭漕船經由漕河領運官軍依限抵通回空方為盡職無罪乃有姦頑官役不守成法多有夾帶私販貨物隱藏犯法人口倚勢恃力行凶害人借名阻礙河道毆打平人託言搜尋失物搶劫民船且有盜賣漕糧中途故致船壞以圖貽害地方種種姦惡督漕各官並該地方官一有見聞即行叅奏務將官員嚴提治以重罪若知而徇隱不奏亦從重處治

六年

命修漕運議單

十七年從河道總督靳輔疏請淮北漕糧例收紅米之州縣准紅白兼收著為令

二十二年定漕船載運額數每船載正耗米五百石土宜六十石至雍正七年

諭增土宜四十石著為令八年又准頭工舵工人各帶土宜三石水手共二十石每船額帶土宜百二十石

乾隆元年定回空漕船所帶食米燒煤江西米四十五石煤四十石湖南米三十六石煤三十二石湖北米三十三石七斗五升煤三十石江南浙江米三十石煤二十五石各關驗放除其稅三年定回空船舵水人等准帶梨棗六十石十年又定首進漕船回空時未及梨棗准帶核桃柿餅抵梨棗之數

三十三年禁折徵漕糧耗米違者以改折漕糧罪

罪之

三十七年江南建平縣漕糧改折私米從民便也
四十九年戶部言漕糧掛欠舊例將本幫運官旗
丁議罪分賠然每年舊欠未清新糧復欠嗣後追
賠漕米應逐幫分計派作十分欠糧之本軍名下
仍追賠一半其半令漕運總督糧道監兌押運僉
運各官分賠請著為令從之

五十四年定封驗樣米舊例各州縣交兌漕米取

米四升分盛二袋印封解倉場驗收至是每船用
米一石糧道親驗印封到淮漕運總督拆驗加封
抵通倉場侍郎率坐糧廳驗明起卸其樣米仍作
正收

雍正元年

諭戶部江西省有漕米各州縣運糧到省又自省倉搬上
軍船故有脚耗扒夫修倉鋪墊等項編載全書歷年支
給已久自康熙二十三年部中誤駁不准支給行令追

還嗣後一例駁追究無完解至三十四年

聖祖仁皇帝特頒諭旨將從前已經支給者俱免追賠恩至渥也至康熙三十八年部議又以脚耗與扒夫等項分晰未清仍令扣還不知脚耗乃貼運之總名扒夫等項乃支給之細數實一事非兩項也自康熙三十八年至今已二十餘載應追銀五十一萬餘兩米六十一萬餘石積累增多究無完解追比日久官民均受其累特諭爾部將從前積欠盡免追賠向後准其支給

是年令漕運總督於開兌開幫之日將糧船各數
運軍姓名冊送戶部察覈

二年以漕運駁淺擾害商船

諭地方大吏示禁漕運總督失察者議處又

諭禁漕船包攬貨物夾帶私鹽私藏火器下漕運總督安
徽巡撫議行

六年

諭江浙徵收漕米但擇乾圓潔淨不必較論米色准令紅

金步
白兼收私粳並納著為令

十一年令河南山東於額徵粟米內改徵黑豆十
二萬石運供

京師仍如漕行

臣等謹按乾隆二年又將粟米改徵黑豆河南二
萬石山東四萬石九年河南粟米又改徵黑豆二
萬九千三百五十六石六升有奇十六年又改河
南粟米徵黑豆二萬石

十三年申禁漕船水手擾害居民令漕運總督飭督速領運官嚴加約束違者論罪

乾隆元年定各省截留漕船介於起運停運之間行糧月糧應給應追向未定有成例應酌定成規以歸畫一嗣後江蘇安徽浙江截留漕船應支本折月糧三修銀準其照數全給至行糧盤耗贈銀負重等項各隨多寡分作十分自水次抵通按程途遠近亦作十分計算行一分程途給一分銀米

如行一兩站未及一分者即按一兩站扣算支給
贈米一項如米到州縣半月放清者按已行之程
扣給其未行之程追繳半月以外每石給米一升
滿一月者給米二升滿二月者給米四升滿三月
者全給若幫貼截留本次或全兌全收或數月後
收清贈米亦按月計算江西漕船較大米數多每
年額領三修銀不敷取辦於行月兼之水次開行
逐節淺阻起駁長江守風過淮修艫一應費用較

江浙不同遇有截留將原領折耗行月贈銀贈米
斛面米均免扣追又每米一石徵耗米四斗為交
通倉及沿途折耗之費副耗米一斗三升為水次
開行抵淮折耗如在淮安以南截留者將四耗米
令其隨正交納副米免其追繳如過淮截留者將
四耗米內正兌米隨交二斗五升改兌米隨交一
斗七升並每石別交一升贈米外餘米按由淮到
通程途作為十分計算行一分程途即給一分耗

米湖北湖南漕船灣泊岳州府濱臨洞庭風波不測截留漕船例給一半月糧之外每船酌留頭舵水手四名防護每名月給口糧一升減去水手人等每站給盤費銀三分米一升照時價折給至五年又定未兌之船截留者照停運例給與減半月糧已兌未開之船截留者減半月糧之外將三修一項照數全給各省畫一辦理七年又定截留漕船已兌開行照定例扣追運軍多有苦累每船山

東河南加給銀五十兩江南浙江六十兩湖廣七十兩江西九十兩其應給之銀即於行月折色銀內扣給所餘行月等銀仍照舊按程分別追給再江西湖廣已過長江者其所餘銀米給與四分之三已渡河至臨德等處者全給

二年

諭戶部曰聞得江浙兩省民間輸納白糧較漕糧費用繁重甚屬艱難朕心深為軫念諭令該部詳考據奏

兩省歲運白糧二十二萬餘石太常寺光祿寺各賓館需用二千餘石王公官員俸米需用十五六萬石內務府禁城兵丁及內監食用等項需萬石尚餘五萬石存倉等語朕思光祿寺等處所支原以供祭祀及賓館之用在所必需其王公官員俸米應用白糧者可酌量減半以秬米抵給至賞給禁城兵丁及內監食米亦可將白糧裁減給以秬米如此則每年所需白糧不過十萬石仍照常徵收起運其餘十二萬

石著漕運總督會同該督撫酌量改徵漕糧其經費銀米均照漕例徵收以紓民力旋遵

旨議行

三年

恩賞運弁銀人各四兩軍半之

是年以湖北通山當陽二縣僻處山陬漕糧難於兌運每石改徵銀一兩二錢五分

四年定重運遇淺駁運例凡重運漕船所經過淺

起駁漕運河道總督奏明即飭所在有司官具民
船駁運有司官將駁過各幫運軍名船米貨物及
駁船雇直各數呈報漕河督撫並巡漕御史其駁
船雇直憑有司酌給如有扣剋勒索者罪之

七年

諭免江西南昌江南興武浙江紹興各幫貸逋銀四千

六百四十兩

十年

諭據工部侍郎范璨奏稱江南下江雜賦重於他省向來徵收弊竇甚多民間每完糧一石借漕費之名或以九折收或以八五折收甚至以八折收至雍正七年蒙

世宗憲皇帝軫念窮黎

敕令嚴加釐剔其時尹繼善為江西撫臣悉心籌畫酌定每石收漕費六分總令小民平斛响攬額外浮粒不收地方官奉法緊嚴彼時府道嘗微行密察諸弊肅

清謳歌載道乃久之故智復萌上年下江收漕賢否
不等聞有初開倉時印官駐宿倉所親驗米色胥吏
尚無間可乘迨至漕糧緊兌之時印官不能處處親
驗吏胥等即多方刁難小民不能等候情願議扣自
九五折至九折不等大漕既畢所徵兵行局恤等米
石竟有扣至八折者此雖得之風聞然法久弊生亦
不可不再加整頓況一處如此他處即相效尤一省
如此他省亦恐難保伏懇特頒諭旨通飭有漕地方

官於開倉之際刊立木榜大張曉示毋許額外需索
令糧道知府等員不時密訪如有刁難折扣等弊即
將官吏一併揭叅至於大漕完竣之後徵收兵行局
恤等項遴委幹員暗加查察稍有違犯亦即稟究如
此則諸弊可以禁止等語徵收漕糧弊竇甚多江南
之漕甲於諸省尤為積弊之藪朕亦知之范璨所奏
著發出令有漕地方大小官員閱看嚴行釐剔如有
仍蹈故轍者經朕聞知或被御史叅劾必重加處分

至於尹繼善既於前江撫任內辦理稱善今節制兩江仍是職任內應辦應查之事何以置若罔聞一聽有司之變易舊規奸胥猾吏得以高下其手也將此詢問尹繼善其又何辭

十一年監察御史沈景瀾請令各甲戶應完漕項細數預給一單庶不至於漕項內每戶暗加分釐以杜浮派之源從之

十七年監察御史陸秩請申禁收漕州縣收兌留

難之弊從之

十九年

諭截漕省分派就近駐劄之道員監看稽察不得但委州縣佐貳以致滋弊著為令

二十四年令僱募緯夫聽軍弁自行酌辦時以各省糧艘北上每遇過閘過壩及急溜淺阻必需人力挽拽者沿河兵丁頗有把持包僱之弊至是嚴行查禁嗣後如藉端抑勒以老弱充數而橫索雇

值者罪之並將失察之該管將弁叅處

二十六年

諭直隸總督事務繁多所有薊運河挑淺工程著就近
令倉場侍郎專管每歲督率通永道薊州知州隨時
相度實力疏濬以利漕運

二十九年

諭司漕各員不得濫收潮潤米色

又漕運總督楊錫紱奏請懲軍籍紳宦富戶規避

簽丁詭捏脫漏之積習以裨漕務從之

四十一年

諭曰沿河短絳多係無業窮民羣聚覓食晝則隨幫受雇夜則乘機為匪其中最易蔽奸而漕艘經行上下遇有頂風淺水添雇幫絳人夫亦屬必不可少莫若令沿河州縣酌量安設絳夫並選派夫頭照管以供受雇其各幫雇覓絳夫並令押運千總督率旗丁查點稽核按站交替不許攜帶過站亦不許中途私雇

庶各有責成不致滋事著直隸山東江南江西浙江
湖廣各督撫會同漕運總督確商妥議具奏

四十七年定管泉各員巡勘章程每年春夏之交
管泉人員親駐泉源處所督夫疏導並飭各本管
州縣一體實力查辦各本管府州於巡漕查勘之
外再行巡查一次分別勸懲

右漕運規例

漕運限期

兌運各省限十一月過淮江北各府限十二月內
江南江寧蘇州常州鎮江等府限正月內松江府
限二月初十內浙江湖北限二月內江西湖南限
三月初十內其不過淮者河南限正月開行山東
臨清牕內亦如之其牕外限二月開行到通程限
山東河南限三月朔日江北限四月朔日江南限
五月朔日浙江江西湖廣限六月朔日通州回空
限十日淮安至天津重運限自半日至十二日有

差回空於有牐壩處限與重運同無牐壩處逆流
限自九日至一日順流限自三時至二日半各有
差天津至通州重運係逆流二十里回空係順流
五十里均限一日山陽至浙江重運順流四十里
逆流二十里回空順流五十里逆流三十里均限
一日違者該管官論如法

順治十二年奉

上諭漕運至為重務年來拖欠稽遲弊非一端漕督固宜

盡心督撫亦宜分任責成除湖廣漕船暫留充餉外江南江北江西浙江等處漕糧著該督撫督率所屬各糧道州縣衛所等官恪遵漕規冬兌春開務依限到淮其到淮以後漕督察驗催趲抵通交納河南山東漕糧該督撫督率所屬各官徵兌開行知會漕督察催北上係何地方遲悞者自督撫以至州縣衛所等官應擬何罪屬何省分者應限若干月日戶部詳確議奏遵

旨議定各省漕糧徵收限十月內兌運限十一月內過淮

江北各府州縣限十二月內江南江寧蘇松等處
限正月內江西浙江限二月內其不過淮之山東
河南二省限正月盡數開行如有司無糧軍衛船
不齊備以致過淮違悞督撫糧道監兌官計違限
一月至三月以上者各降罰有差如兌糧及期領
運等官沿途違悞者計違限十日至一月責革有
差經徽州縣衛所等官船到無米有米無船過十
二日至二月者各降罰有差漕督通漕有催趲之

責過淮以後河督亦有催趲之責如過淮及期而
到通遲悞者河漕二督及沿河鎮道將領州縣等
官亦照督撫糧道監兌官例議處至康熙五十一年
增定違限一二月者如舊例行違限二月以上
或七十日者督撫降一級戴罪督催糧道監兌官
降二級調用八九十日者督撫降一級留任糧道監
兌官降二級調用至雍正十三年題准山東臨清
插內之船照定例行其插外之船限次年二月兌

開乾隆九年又題准江南松江府漕船必由葦柳澱山等湖湖南經涉洞庭江西必由鄱陽各幫船於過淮原限外寬限十日

十六年定漕船回空過淮者責之漕運總督不過淮者責之糧道覈其船原數闕者罪之

十七年定押運府倖過淮抵通違悞者如糧道例議罪

康熙二年各省漕糧漕運總督刊發全單開列本

幫兌糧軍船數目行月修船錢糧及到次開兌開
行過淮到通回空違限日期與夫驗米色察夾販
款目畢具各弁投到全單嗣後依式填注如有違
悞不填及填注不實者在南聽漕運總督在北聽
倉場侍郎察叅

四年定漕船回空限期漕船抵通州限十日回空
倉場侍郎定立限單責成押運官依限到淮

十一年定漕船抵通限期山東河南限三月初一

日江北限四月初一日江南限五月初一日江西
浙江湖廣限六月初一日到通均限三月內完糧
如違限不完押運等官計違限不及一月至二月
以上者各降罰有差

又定白糧過淮抵通違限者督運官議如督運漕
糧例

十七年增定重運回空沿途期限各省漕船重運
自淮安至天津原有定限今加增定如原限半日

而違限一時原限一日而違限兩時原限一日半
而違限三時原限二日以上而違限半日原限四
日以上而違限半日原限六日以上而違限一日
半原限十二日而違限兩日專催督催官各議罰
有差原限半日而違限三時原限一日以上而違
限半日原限兩日以上而違限一日原限四日以
上而違限兩日原限六日以上而違限三日原限
十二日而違限四日者專催督催官各降罰有差

如違限之期與原限之期相等者降調逾於原限者降革各有差回空自天津至淮安向亦有定期如今更定如逆流順流而有牐壩均照重運定期如無牐壩逆流原限十二日者改為九日四日改為三日三日改為二日二日半改為一日順流原限半日改為三時一日改為半日四日改為二日五日改為二日半如致違限沿途文武官並隨幫官皆照催趲重運例議處天津至通州重運係逆流

二十里限一日回空係順流五十里限一日山陽
至浙江重運順流四十里限一日逆流二十里限
一日回空順流五十里限一日逆流二十里限一
日如有違限照例議處至鎮江渡江如因風守候
令地方官報明免議再江西湖廣漕船行長江至
儀徵者因風挽運難以立限應令地方官作速嚴
催出境其自儀徵至天津皆如新定例行

二十八年定漕船受兌離次各省巡撫題報期限

不得過二月逾限者論

三十四年令漕運總督每年將過淮漕船總數繕造黃冊專疏具題

五十一年

諭凡事不求根本止務枝葉斷無實效條奏漕糧一事者止以沿途耽閣開兌遲悞陳奏其漕船稽遲根原從無一人言及朕南巡數次河道總運知之甚悉如上江漕船皆入儀徵河口下江漕船皆入瓜州河口因大江泊

船不便而四千餘艘彼此相爭入口灣泊必俟到齊始
挨次開行則守候之間甚至遲誤若凡一幫全到在先
不必等候各幫隨令起行過淮其續到者亦照此勿令
守候止以船到即令起行則全幫得以早行後幫慮其
隔絕自然奮勉追行如此則重運回空斷不致遲悞下

部議行

是年定給漕船限單漕船受兌開幫巡撫給以限
單填註開行日期飭令沿河州縣挨注入境出境

時日抵淮將單呈繳漕運總督察驗過淮後漕督亦給以限單將經過州縣原定限日刊入單內飭令沿河州縣注明入境出境日期俟抵通將單申繳倉場侍郎察驗回空倉場侍郎刊發限單沿河州縣填注亦如之至淮申繳漕運總督察驗漕督別給抵次限單沿途填注亦如之抵次之限不得過十一月既抵次將單申繳巡撫察驗

雍正三年定漕白糧船抵通日期及起卸回空船

糧各數並石壩外河水深淺令倉場侍郎五日一次具奏

七年定漕船經過濟寧臨清二處令河東河道總督題報舊例漕船經過皂河濟寧臨清三處由河道總督題報時山東河南增設總河故以濟寧臨清歸河東總河題報皂河仍歸江南總河題報乾隆二年定山東自備船回空之例山東自備船令于交糧之日除留頭船一二人通候領簞羨完

呈等項外其餘各軍給與空身限單勒令回次抵
次將軍呈繳各衛所察驗仍將限單填明到次日
期彙送糧道考察留通運軍事竣回次亦如之
七年定山東漕船不由漕運總督給發限單受兌
之後即呈報河道總督及巡漕御史稽察催行

右漕運限期

漕運官司

漕運總督一人總理直省糧儲轉漕以輸

京師巡漕御史四人掌巡視稽察糧道山東河南安徽江蘇浙江江西湖北湖南各一人分掌漕務督運過淮監兌官山東六人河南三人江南十有五人浙江江西湖南各三人湖北六人以管糧同知通判為之押運官山東河南各一人江南七人浙江三人江西二人湖北湖南各一人以管糧通判為之領運官漕糧直隸千總四人領河南運山東守備一人千總三十六人內領河南運四江南守備八人蘄運四人

人千總九十八人

內領河南運四人

浙江守備二人千總

十八人江西守備二人千總二十五人湖廣千總

二十有二人白糧千總六人浙江千總四人

均以衛所官為之每幫武舉一人隨幫効力運軍

每船一人僉軍籍人充役至於催運則凡漕船所

經沿河文武官皆有責焉

順治二年定漕運官司一仍明制輓運則設旗甲

統領則設運總督押則設漕道糧道提衡巡察則

設總漕巡漕

七年裁巡漕御史

十二年定五年一編審軍丁毋許竄入民籍

康熙元年嚴沿途文武官催趲之責催趲不力者

論

二十二年

諭漕運總督管理糧船是其專責漕運過淮及回空之時

應令總督往來親催自奉

諭後漕督親督重運至通歲以為例

二十六年申嚴運軍代運之令定例運軍不親押
運以子弟代行者運軍及代運人均發邊衛充軍
至是並嚴該管官處分

三十五年定出運每船僉軍一名定例每船運軍
十名至十一二名不等康熙二十五年改定額設
十名至是每船僉軍一名其餘水手九名擇有身
家並諳習撐駕者雇充

四十五年定僉軍例親僉責在糧道舉報責在衛
守備用舍責在運弁保結責在通幫衆軍一軍無
保不准僉軍一軍有欠衆軍同賠至五十一年增
定令千總結保衛守備府倅親驗結申糧道如有
欠糧出結官坐罪

五十一年定僉副軍一人隨運每年於本軍子弟
及兄弟之子再僉一人為副軍隨運如抵通欠糧
留本軍完欠副軍回空如重運到淮虧缺令本軍

駕運北上留副軍買米趕幫

雍正元年

諭漕船務於本軍內擇其能撐駕者充當水手不得雇募
無籍之人

四年

諭押運同知通判抵通之日著總督倉場侍郎送部引見
六年定文學生員准免僉運

七年

諭朕聞漕船過淮所費陋規甚多嗣後著御史二人前往
淮安稽察不許官吏人等向運軍額外需索以致擾累
其糧艘中攜帶物件除照例許帶外如運軍有夾帶私
鹽及違禁等物者亦著該御史稽察但不得過於嚴刻
吹求以致糧運滯遲至漕船抵通之時其該管衙門官
吏及經紀車戶人等恐有向運丁額外需索陋規者亦
著差御史二人前往稽察淮安於二月初差往通州於
四月內差往不必拘定滿漢各一人著都察院按期開

列請旨

臣等謹按乾隆二年令御史四人分地巡視一人駐淮安自江南江口至山東交界一人駐通州自通州至天津一人駐濟寧自山東臺莊至北直交界一人駐天津自天津至山東交界各按所分之境巡察諸弊

乾隆八年令江淮興武二衛黃快船丁歸入民賦以嚴勾考時以江淮興武二衛運軍有竄入黃快

船避僉者故令黃快船丁歸入民賦每五年將現
運及備僉餘軍勾考一次將本軍及子孫兄弟之
子並所居州縣都圖鄉鎮注冊送戶部察覈

三十七年令糧道親自督運到淮不得轉委丞倅
代押

四十八年

諭向例總督俱兼兵部尚書右都御史銜巡撫俱兼
兵部侍郎右副都御史銜但漕運河道總督並無地

方之責究與各省總督不同況又有由道員陞署及簡擢初任之員若一例兼銜未免太優不可不量為區別嗣後漕運河道總督該部俱奏請給與兵部侍郎右副都御史銜著為令

右漕運官司

漕船

各省原額萬四千五百五號除改折分載帶運坍荒闕額漕糧裁減船數外實運船數

右謹據會典則例恭載第

各省漕糧屢蒙 恩免漕艘 直隸三十七號 協
出運即有增減仍不拘定額 濟

河南 山東九百七十五號 協濟河南二 江南江安糧
百四十四號

道所屬二千八百八十六號 協濟河南一百二十
五號 協濟蘇松千八

百三十 蘇松糧道所屬四百三十九號浙江五百
五號

六十九號江西三百四十八號湖北一百二十號

湖南百十有四號河南無漕船直隸山東江南就

近協運四百有六號白糧船江南一百三十六號

在通省漕船內 浙江六十三號 在通省漕船
三年抽調一次 內撥定長運 自備

船無定額

各省漕船缺額運軍雇募民船裝運官給其直

催漕船沿河每

汎一號袋船六十號

順治四年定各省漕船缺額令運軍自備船裝運
自備船不支三修料價僅給重運銀令其雇募民
船至順治九年定給水脚銀江南蘇州松江安慶
廬州並江西浙江等處每石自三錢至三錢五分
揚州府每石二錢五分均於隨漕項內動給
十年以白糧無漕船令攢廠成造

十三年定貼造漕船之例凡成造漕船例於州縣
民地徵十分之七衛所軍地徵十分之三給備料
價其有不敷於江寧各衛屯米每石協濟銀一錢
黃快船每丁協濟銀五分官舍餘丁編為三則上
則納銀五錢中則三錢下則二錢審定造冊徵收
解廠安慶衛以屯田勻配上下兩運公同貼造新
安宣州二衛按屯田編徵貼造建陽衛於屯丁銀
內加徵貼造廬鳳淮揚徐滁等衛蘇太等衛所及

山東各衛均按清出丁舍編徵貼造浙江按清出
閑丁每丁徵銀四錢江西每丁徵銀二錢五分湖
廣每丁徵銀二錢以供貼造若船多銀少儘數勻
攤是年又飭將各衛所舍餘閑丁按年編審納銀
為幫貼之費至康熙十九年始定漕船額支官銀
成造其清出丁銀概飭解部

康熙三年增造浙江白糧船六十四號浙江白糧
用漕帶之法需船百二十號除六十二號於漕幫

內抽出裝運外增造六十四號并入漕幫僉運十四年定江蘇白糧照浙江例抽選漕船裝運五年更換康熙四十三年浙江運白漕船亦定為五年更換乾隆七年以浙江運白不願更換仍依舊例撥定軍船永遠承運十六年改江南五年更換之期為三年

二十六年定各衛所漕船照每年見運之數成造十分之一

又定各省歲修漕船每出運一船給修費銀七兩五錢

雍正二年裁船政同知先是江浙設船政同知至是罷一切修造漕船事宜歸糧道管理令運軍支領料價赴廠成造所有不敷即於道庫減存漕項銀內動支其蕪湖淮安杭州等關額供造船銀飭令解部五年定催漕船成造歲修銀數催漕船按汛成造每船給銀三十七兩六錢三分三釐動支稅課銀

每歲給小修銀二兩動支茶果銀十年期滿照例
別造

八年定漕船裏料銀

舊例成造新船將舊船解廠
充作裏料如無交銀五十一兩

九年

諭戶部江南江淮興武二衛運軍名下有應追鑽夫底料
銀十萬八千一百餘兩此項自康熙四十二年至雍正
元年前後共二十載各軍僉替更換不一見今著追之
人未必係當日領米之人其力既不能完未免有所拖

累且今承追接催各官叅罰累累有碍考成亦可軫念
著將二衛應追夫役及底料銀悉行豁免

乾隆十一年增設堡船

國初以漕船至天津起撥分運至通設紅撥船六百

隻每船給田十頃養贍免其徵科至康熙三十九年裁革紅撥船按原給田所收租額分派各省於漕糧項內徵給運軍雇船撥淺乾隆二年每船給紅撥銀二兩至是北河增設堡船六十號祇夫百八十名淺夫三百名隨時疏濬以免丁累其置造堡船器具夫工等費於紅撥銀內動支餘銀仍照數分給運軍以備撥淺之用

二十四年漕督楊錫紱奏江西幫船情形與江浙

等省不同可以通融裁減且於辦公有益從之

右漕船

倉庾

在

京師者十有三倉祿米南新舊太富新興平太平萬
安七倉在朝陽門外海運北新二倉在東直門外
本裕倉在德勝門外清河儲濟裕豐二倉在東便
門外豐益倉在德勝門外安河橋又太通橋朝陽

門號房二處其在通州者三倉西倉在新城內中
倉在舊城內南倉乾隆十八年裁又石壩土壩舊城南門
新城南門號房四處專設官管總督倉場侍郎一
人總理北河河道及漕船倉庾之事

欽簡大臣蒞其任坐糧廳各倉監督咸隸焉坐糧廳滿漢
各一人掌北河疏築督催漕船收運倉米出納庫
銀及通州稅課之事大通橋監督滿漢各一人掌
抽盤督催之事兼驗收隨漕松板

京師豐益倉監督滿二人餘十二倉滿漢各一人掌
倉糧出納之事稽察官每倉

欽命御史一人專司倉房完損糧米侵盜之事率於歲終

更代

順治十年製鐵斛頒發倉場永為定式

十三年定各倉收米限期京倉限十日通州倉限

七日畢印給倉收以坐派紅單

即印票

到日起限逾

限者劾之

康熙二年定漕糧完欠分數以嚴考成坐糧廳經
管漕糧除帶運米外將餘米併入正運總作十分
考覈未完六釐以上不及一分者罰俸六月一分
以上不及二分者罰俸一年

雍正二年定運米經紀車戶掣欠賠抵之例經紀
運米到橋車戶運米進倉舊例每米五十袋抽掣
一袋一袋短少餘袋例算於各役腳價內扣賠至
是定經紀係船運每十萬石定掣欠二百石大通

橋車戶係陸運每十萬石掣欠二百五十石通倉
車戶係水陸兼運每十萬石亦掣欠二百石每石
杭米作價銀七錢稜米六錢准於腳價內扣抵若
欠數多除不准腳價扣抵外照盜賣漕糧例治罪
每杭稜米一石作價銀一兩四錢行地方官將家
產變賠乾隆三年增定每石准其掣欠八合照七
錢六錢之例買餘米賠補若欠數多仍照一兩四
錢之例於腳價內扣抵

五年

諭在京各倉每倉或都統或副都統各一人御史中不分
滿漢每倉各委一人專任稽察之責其支放奏銷等事
不必經管惟倉房滲漏牆垣損壞與倉內鋪墊及匪類
盜竊各弊察出即行文倉場侍郎知之若倉場侍郎不
及時辦理妥協即據實奏聞倘不能察出弊端以致虧
損倉糧著落稽察之都統副都統御史與倉場監督等
官分賠通州三倉即照此例交與通永道通州副將稽

察其失察分賠之例與京倉同

乾隆三年製鐵尺用積方之法覈算倉糧積方之法二年以內方一尺照三斗一升六合之法三年以外方一尺照三斗四升之法二年以外三年以內者方一尺照三斗二升八合之法丈算鑄鐵尺分頒戶部倉場及各倉嗣後均依尺丈量

是年定各倉貯米每廩以萬石為率其奇零之數別貯一廩

十七年定稽察各倉官除都統值班御史在城理
訟之期均更番到倉稽察違者令巡漕御史糾叅
是年增定稽察倉庾事例京通各倉每倉差御史
一人稽察年終更代將一年有無弊竇奏明交戶
部存案奏報不實者議處其各倉收漕滿厰倉場
侍郎封固御史加封各厰鎖匙倉場衙門收貯每
夏冬二季驗封加封新舊監督交代整厰驗封零
厰抽盤如有攙和短少揭報倉場侍郎及御史公

盤得實治罪勒賠其監督交代限兩月交完出結
十八年

諭向來旗員承修廩座往往慮及工部料估之數不敷
輾轉議增議減以致遲延時日嗣後各倉遇有應修
工程著工部倉場該旗各派司官一員會同料估修
理

是年御史曹秀先奏通倉各廩匙鑰新例交倉場
侍郎收執其殘廩用都統御史封條恐陰雨查驗

不便請盡交滿漢監督以專責成又收漕甫完倉廩即行封閉恐鬱蒸之氣未出以致糜爛請俟深秋始行上板加封使米不受傷下部議行

二十七年定監督期滿更代之例京通各倉滿漢監督三年期滿不准留倉如有滿漢同時任滿准倉場侍郎於各倉監督內揀選調補

三十三年查倉大臣兵部尚書托庸等奏盤驗京通各倉丈量之法每屆五年查辦一次徒滋糜費

應請停止嗣後分年支放按倉分劃新收舊貯作何查驗考覈以杜牽混之處另行會同倉場侍郎詳籌妥議辦理從之

四十一年

諭各倉廠座應行拔草修理時即著工部堂官揀派司員帶領工匠前往妥協辦理無庸各該倉自僱匠役至太平萬安兩倉地形稍窄嗣後如遇工程即將拆下渣土隨工出運仍造冊送部查核

定直省州縣倉庾建於各州縣城內其收兌稽察
知州知縣自監之若其地不通水道者則建倉於
隣邑水次以便起運

右倉庾

皇朝文獻通考卷四十三

欽定四庫全書

皇朝文獻通考卷四十四

國用考

六

蠲貸上

賜復

順治元年京城遭明末寇賊蹂躪之後其民居被
逼遷徙者免賦役三年被毀未遷者免一年大兵
所經田禾被傷者除本年田租之半河北府州縣

衛免租三之一

二年免河南被寇額賦有差是年山西初復除本年田租之半

三年免江南漕三之一具潛山太湖英山霍山諸縣皆除之

五年以湖廣岳州辰州諸府為大兵所經宿處免賦有差

十一年

詔順治六七兩年民間地丁逋賦勿收責

十三年

詔除順治八九兩年逋賦

是年定蠲荒流抵恐惠不下逮令民登填布政司冊以禁濫收

康熙元年江西南昌新建豐城進賢奉新靖安五縣浮米及浮米折銀悉除之

二年

詔順治十五年以前民欠銀米物料皆勿收責

四年

詔天下逋賦在順治十六十七十八等年者悉除之

十年

詔巡幸經歷通州以東至山海關免今年租

十九年免江南康熙十二年以前逋賦

二十三年

恩詔減江南江西浙江湖廣漕三之一

二十四年

詔免河南湖北今年租及二十五年歲租之半直隸江南
被災之地二十四年秋冬二十五年春夏歲租悉
除之

二十五年免直隸順天永平保定河間四府四川
貴州二省康熙二十六年額賦及今年賦之未入
者湖廣福建二省二十六年秋冬二十七年春夏
額賦及二十五年賦之未入者亦如之

又

諭免直隸正定順德廣平大名四府明年田租

二十六年

恩詔自用兵以來動用錢糧累年未清者皆予除洗又
諭免江蘇陝西省明年額賦其今年賦之未入者亦除之

二十七年

聖祖仁皇帝南巡

詔免江南安徽府屬去年田租並

諭令康熙十七年以前直省民欠漕銀米麥皆勿收責

又

諭曰朕南巡至江南境上所經宿遷諸處民生風景較前次南巡稍加富庶朕念江南累年帶徵錢糧恐為民累出京時曾詢戶部知全省積欠約有二百二十萬除江南正項錢糧已與直隸各省節次蠲免外再將江南全省積年民欠地丁一應錢糧屯糧蘆課米麥豆雜稅概予蠲除

是年以雲南供億

王師勞瘁免二十一年至二十七年逋賦

三十年

諭曰朕撫御區宇三十年以來夙夜圖維惟以愛育蒼生俾咸臻安阜為念比歲各省額徵錢糧業已次第蠲豁其歲運漕米向來未經議免朕時切軫懷所有京通各倉米穀樽節支給數載於茲今觀近年儲積之粟恰足供用應將起運漕糧逐省蠲免以紓民力除河南省明歲

漕糧已頒諭免徵外湖廣江西浙江蘇安徽山東應
輸漕米自康熙三十一年為始以次各蠲一年至江寧
京口杭州荊州大兵駐防地方亦應豫行積貯將康熙
三十一年起運三十年漕米各截留十萬石存貯倉廩
以備需用

是年江西南昌等五府康熙二十二年至二十七
年帶徵逋賦吉水縣二十七年以前各逋賦悉予
放除又奉

旨免湖南明年漕

三十一年免廣東化州瓊州等四州縣康熙十八年至二十九年逋賦

三十二年

諭曰朕念廣西四川貴州雲南四省皆屬邊地土磽确瘠民生艱苦與腹內舟車輻輳得以廣資生計者不同朕時切軫懷數歲以來錢糧皆經次第蠲豁茲念育民之道無如寬賦矧邊省地方非再沛優卹之恩則閭閻無

由充裕所有康熙三十三年四省應徵地丁銀米著通行蠲免

三十三年免江南邳州康熙二十四年至二十七年逋賦並免直隸安州等十一州縣明年田租三十四年

詔免河南康熙三十二三十四年逋賦

三十五年免天下漕賦銀米宿逋又以直隸宣化山西大同及陝西省因征厄魯特噶爾丹供億大

兵免明年田租

三十六年免山西甘肅明年田租及陝西榆林等
沿邊州縣衛今年租又免蘇松等府州康熙十八
年至二十六年逋賦

三十八年

聖祖仁皇帝幸江南浙江康熙三十四五六年逋賦悉予
放除又

諭曰朕巡省民生風俗南至江浙茲已返蹕行經山東沿

途見父老諮詢農事幸今歲雨暘時若二麥繼登小民
可以無憂粒食但前年被災泰安等二十七州縣生計
尚未豐盈宜更加恩休養所有康熙三十六年未完地
丁銀米均著免徵

是年免湖廣康熙三十九年甘肅四十一年各田
租直隸薊州康熙三十三十二年退地逋負江
南淮揚三十場竈戶康熙三十七八年鹽課皆止
勿責

四十一年免安徽明年租又以秦省不通水運河西地尤貧瘠悉除明年田租

四十二年

聖祖仁皇帝幸山西除山西去年逋賦

是年免山東河南雲南貴州廣西四川明年田租
浙江康熙四十四年田租

諭免亦如之其江南睢寧縣康熙三十七八九年邳州四十年各逋賦並山東積逋之在民者皆勿收責

四十四年免湖北湖南明年租其帶徵宿負並停
輸納

是年

諭嗣後蠲免新糧之年停徵舊欠俟次年徵輸

四十五年以舊稅新徵勢難兼辦分年帶輸仍多
拮据

諭免天下逋賦直隸康熙四十一年至四十三年銀八萬
二千七百兩糧五千九百石山東康熙四十二年

銀一百六十九萬千七百兩糧五千九百石山西
陝西甘肅江蘇安徽江西浙江湖北湖南廣東康
熙四十三年以前銀二百十有二萬二千七百兩
糧十萬五千七百石各有奇悉予放除其已入者
作本年正賦

四十七年免江南明年田租

四十九年

諭曰朕比年省方時邁已閱七省南北人民風俗及日用

生計靡不周知而民所以未盡殷阜者良由承平既久戶口日繁地不加增產不加益食用不給理有必然朕洞燭此隱時深軫念爰不靳敷仁用甦民力明年為康熙五十年原欲將天下錢糧一概蠲免因廷臣集議恐各處兵餉撥解之際兵民驛遞益致煩苦細加籌畫悉以奏聞故自明年始於三年以內通免一周俾遠近均沾德澤直隸奉天福建浙江廣東廣西四川雲南貴州各巡撫及府尹所屬除漕項錢糧外五十年應徵地畝銀

共七百二十二萬六千一百兩有奇均予豁免並累年
舊欠共一百十有八萬六千一百兩有奇亦著免徵其
五十一年五十二年應蠲省分至期候旨行

是年奉

旨免江南淮揚徐三府淮徐泰三衛田租其湖廣康熙五
十一年田租四十八九年逋賦

盛京奉錦承德等府州明年租穀並予放除

五十年免福建臺灣府明年租穀

稻穀例不入蠲而臺灣有穀無銀時奉普蠲之令
巡撫黃秉中以為言

上以歲租已入

諭除明年租

五十一年

諭曰朕宵旰孜孜勤求民瘼永維惠下實政無如除賦蠲
租除每歲直省報聞偶有水旱災傷照輕重分數蠲免
正供仍加賑卹外將天下地丁錢糧自康熙五十年為

始三年之內全免一周使率土黎庶普被恩膏除將直隸奉天浙江福建廣東廣西四川雲南貴州及山西河南陝西甘肅湖北湖南各省康熙五十年五十一年地丁錢糧一概蠲免累年舊欠錢糧一並免徵外所有江蘇安徽江西山東各撫屬除漕項外康熙五十二年應徵地畝銀共八百八十二萬九千六百四十四兩有奇人丁銀共一百三萬五千三百二十五兩有奇悉予豁免其累年舊欠銀二百四十八萬三千八百二十八兩

有奇著一并免徵計三年之內總免過天下地畝人丁
新徵舊欠共銀三千八百有六萬四千六百九十七兩
有奇各該督撫務須實心奉行體朕軫念民生至意

是年以陝西潼關衛山西大同府今年應免之米
豆薪芻已徵在官其明年之應徵者除之又免陝
西西安今年租

五十二年

詔免天下明年房地租稅及積年逋懸

是年免山西河南陝西西安府及會寧等處今年

田租

五十四年

諭免順天永平保定河間宣化五府明年田租

五十五年

諭策妄阿喇布坦近忽侵擾哈密故特徵兵備邊一應飛
芻輓粟悉支正供毫無累及閭閻今歲山西陝西二省
雖屬豐收猶念兵民効力轉輸無誤特將沿邊一帶運

糧地方自山西大同府屬前衛右衛大同懷仁馬邑朔
保德七州縣衛直至陝西延安府屬府谷神木等共四
十二州縣衛所堡康熙五十六年額徵銀八萬六千一
百兩有奇糧米豆穀三十一萬七千七百石有奇草二
千七十六萬五千九百束有奇通行蠲免並將從前積
年逋欠銀糧草豆悉予蠲免

是年又免直隸田租

五十六年

諭免直隸江蘇安徽江西浙江湖廣西安甘肅八省帶徵
屯衛銀二百三十九萬八千三百八十兩有奇其
江蘇安徽帶徵漕項銀四十九萬五千一百餘兩
米麥豆十四萬六千六百十有餘石以半除之

是年

諭曰頃者朕巡幸口外經過三河等州縣及永平府交界
地方見今歲秋成豐稔米價稱平惟是去年雨水過溢
田畝間被淹沒朕深加軫卹蠲賦平糶轉漕分賑貧民

使不至失所今者雖復有年然僅足支一歲之用恐來
年之輸將尚多難繼是必再沛恩膏始可大培民力著
將順天永平兩府所屬大興宛平通三河密雲薊遵化
順義懷柔昌平寶坻平谷豐潤玉田良鄉涿武清永清香河
霸大城文安房山保定延慶盧龍遷安樂亭灤撫寧昌黎
等州縣山海梁城等衛所康熙五十六年地丁銀二十
六萬四千三百餘兩米豆高糧二萬一千六百餘石草
九萬四千九百餘束通行蠲免所有屢年積欠銀九萬

三百九十餘兩米豆高糧萬六千二百餘石草八萬四千四百餘束亦并予蠲除

五十七年以軍興免陝西甘肅兩省逋賦及明年田租其甘肅康熙五十三四五年未入之銀米草豆悉予放除

五十八年又以沿邊民勞轉輸免陝西延安府屬府谷神木等六十六州縣衛所堡明年賦銀九萬八千一百兩有奇

五十九年免陝西甘肅康熙六十四年額賦延慶
等五州縣今年雜糧

是年免福建臺灣府民番銀粟

六十一年

世宗憲皇帝諭古北口一路為我

皇考每年行幸之地百姓効力有年今將宛平順義懷柔
密雲平谷五縣昌平一州雍正元年應徵正項錢糧一
萬四千三百八十兩盡行豁免

是年以大興三河通薊遵化為

陵寢經由之路

諭免明年額賦

雍正元年免宛平等十一州縣田租雜稅又

諭免江蘇等屬康熙三十三年以前逋賦旋又

命三十四年以後逋賦亦勿收責共八百八十八萬兩有

奇其旗丁康熙三十八年至五十年逋糧陝西康

熙六十年以前未入之銀米豆草悉除之

二年

諭恩詔議免各省錢糧自康熙十八年至四十五年止著
加恩將五十年以前舊欠銀米等項均察明豁免

是年免廣東海康遂溪今年租直隸霸州等七州
縣逋賦二萬七千七百餘令勿收責

六年免直隸明年起運銀四十一萬七千八百餘
兩

是年

諭免福建康熙五十五年至雍正四年逋賦三十三萬八千三百餘兩其有已徵在官者除明年正賦

七年西藏苗疆平免甘肅四川雲南貴州廣西明年租並免西安田租十之三以四川巡撫憲德言免瀘州今年租其已入者除明年正賦

是年

諭免山東廣東直隸陝西山西安徽明年額賦各四十萬兩又免浙江民屯田租十之二

八年

諭國家經費既敷宜藏富於民朕特降旨蠲免已多今次第舉行應及江西湖北湖南三省著將雍正九年錢糧各蠲免四十萬兩直隸畿輔首善之地應沛殊恩山東今歲被水之州縣稍多朕心深為軫念著將九年直隸山東通省錢糧各蠲免四十萬兩

九年又以軍興勞民西安地丁銀免十之三甘肅全除之並加免二省額賦四十萬兩又

諭免甘肅之河州廳洮州衛歸德所西寧涼州府番民本年米芻

十年免甘肅今年米芻其已入者明年以實除之
是年除臺灣彰化縣雍正八年未入銀穀以凶番
初定抒民力也

十一年

諭雲南元江普洱兩府猺夷蠢動夫役頻煩之後恐小民
輸將力有不逮著將元普兩府雍正十一年額徵條銀

公件銀並行蠲免

是年免甘肅今年額賦二十七萬九千三百兩有
奇河南額賦四十萬兩

十三年免雲南貴州及湖南之沅州今年田租其
貴州州縣之被殘破者給復三年

是年九月今

皇上登極

詔免天下田租又

諭免雍正十二年以前逋租其江南積逋內有官侵吏蝕二款亦予放除隨

諭訓業戶各計所免之數捐十分之五以惠佃農又以陵寢興工除大興宛平良鄉涿房山涑水各州縣明年租明年又免各州縣入官地租十之三

是年

諭免者若直隸旗退入官各地各省漕糧甘肅芻米在雍正十二年前者勿收責其貴州被賊州縣今

年租糧四川明正沈令及口外新附處所又涼山
會川鹽源阿樹木坪普安安阜酉陽各處本年貢
賦西安明年地丁甘肅半之並予放除

乾隆元年

諭免甘肅乾隆二年租西安半之

二年

上以經理

山陵大事自京至易州七州縣民趨役勤慎免今年田

租陝西寶豐渠二縣招墾新戶逋賦在雍正十三年以前者勿收責並免今年糧料其涼西番民糧料準屯地科則免三之一

是年定蠲免以奉

旨日為始先期有已徵在官者作明年正賦又定陝西甘肅額徵匠價銀遇蠲準一例蠲免皆著為令

四年

諭免直隸本年錢糧九十萬兩江蘇百萬兩安徽六十

萬兩又陝西榆林等十一州縣民貸倉糧在雍正十二年
至乾隆二年者勿收責

六年免

行圍所經地今年額賦十之三又

諭準噶爾來使進藏熬茶曾令納克舒三十九部落豫
備馬匹毫無違誤黽勉奉公甚屬可憫著加特恩將
本年應納錢糧寬免

七年

諭曰朕御極以來愛養黎元於蠲免正賦之外復將雍正十三年以前各省積欠陸續蠲除以息民間追呼之擾今查雍正十三年正月起至十二月江蘇安徽福建三省未完民欠正項錢糧銀共一十七萬七千六百七十四兩六錢零甘肅福建江蘇等三省共未完民欠正項米豆糧共九萬五千二百六十九石零甘肅省民欠未完正項草一百七萬四千二十一束零又直隸江蘇安徽甘肅廣東福建等六省民欠未完

雜項錢糧銀二千九百二十四兩零福建省民欠未完雜項租谷四百四十八石零此等拖欠各項歷年已久多係貧乏之戶無力輸將況江蘇所欠獨多目今彼地現被水災待恩撫卹豈可復征負逋著將以上各項悉行豁免若諭旨未到之先或有續完之項即咨部扣除再查江浙二省尚有雍正十三年未完漕項銀七萬一千二百七十兩零米二萬九百四十九石零麥四千三十七石零豆一百八十五石零向

來漕項不在豁免之例今既蠲除各項著將漕項一體免徵此旨到日各該督撫可即出示通行曉諭並令各州縣官實力奉行務令閭閻均沾實惠

是年免甘肅雍正六年至十三年以前逋賦柳林湖三清灣柔遠堡毛目城雙樹墩九壩各屯戶所貸牛種武威平番永昌古浪西寧碾伯等六縣三年帶徵銀並予放除

八年

駕幸瀋陽

諭盛京戶部莊頭每年交納倉糧今朕恭謁

祖陵親詣盛京軫念各莊頭終歲勤苦輸將無誤著將八年分應交倉糧加恩寬免再各莊頭尚有七年分未完米豆草著覈明一併豁免又免納克舒三十九部落番子明年額賦

是年以直隸望都靜海冀武邑四州縣貸糧宿逋追呼累民除之

九年免肅州九家窑未完牛具

十年

諭曰我朝

列聖相承深仁厚澤無時不加意培養元元以期家給人
足百年以來薄海內外物阜民康共享昇平之福朕
臨御天下十年於茲撫育蒸黎民依念切躬行儉約
薄賦輕徭今寰宇敕寧既鮮糜費之端亦無兵後之
耗是以左藏尚有餘積數年來直省偶有水旱朕加

意賑濟多在常格之外如前年江南被水撫綏安插
計費帑金千餘萬兩凡此皆因災傷補救而沛恩澤
者朕思海宇乂安民氣和樂持盈保泰莫先於足民
仰惟我

皇祖在位六十一年蠲租賜復之詔史不絕書又曾特頒
諭旨將天下錢糧普免一次我

皇考旰食宵衣勤求民瘼無日不下減賦寬徵之令如甘肅
一省正賦全行豁免者十有餘年朕以繼志述事之

心際重熙累洽之候欲使海濱山陬一民一物無不均沾大澤為是特降恩旨將乾隆十一年直省應徵錢糧通行蠲免又以芻糧例不入蠲

諭將甘肅臨邊各屬明年芻糧一體放除河東西各屯免三之一亦如之

是年福建臺灣粟米湖南乾州鳳凰永綏苗民雜糧四川民番貢賦陝西玉樹納克舒馬貢並瓜州安插回民未賞牛種悉予放除

十一年

駕幸山西免

駐蹕之五臺縣明年額賦十之三

是年瞻對平凡四川打箭爐口內外効力之各番
部給復二年其直隸霸州固安屯糧奉天錦州米
豆浙江玉環山海寧縣大疊中小疊各銀穀例不
入蠲以輪遇普蠲之年皆

特諭免之

十二年

諭曰朕嘉惠黎元輪免天下正供山西通省地丁應於
十三年全免惟該省太原平陽潞安寧武澤州蒲州
六府遼沁平忻代保解絳八州及歸化城所屬有額
徵本色米穀豆麥以供兵餉例不蠲免但此次特沛
恩施亦應量加愷澤得以均沾著將太原等府州應
徵本色酌免十分之三其大同朔平二府地處邊瘠
頻年歉收著全行蠲免

是年免河南灘地官莊官地義田廣東官租學租
屯地曠軍餘羨各賦例不蠲免者均免十分之一

十三年

駕幸山東免所經州縣今年田租十之三

是年

諭曰朕時邁東巡前詣闕里至於岱宗舊典聿修明禋
肇薦東省今年錢糧見已普免因思曲阜泰安歷城鑾
輿駐蹕之所也著將三縣乾隆十四年應徵地丁錢

糧全行蠲免

十五年恭謁易州

陵寢

諭免經臨州縣田租被災者十之五未被災者十之三

是年

駕幸嵩洛

諭此次巡幸河南省方問俗所至推恩尤念祥符為省會之區登封實望秩之所鑒輿駐蹕宜沛恩施著將

該二縣乾隆十六年應徵地丁錢糧全行蠲免

十六年

諭曰朕巡幸江浙問俗省方廣沛恩膏聿昭慶典更念東南貢賦甲於他省其累年積欠錢糧雖屢准地方大吏所請分別緩帶以紓民力而每年新舊並徵小民終未免拮据朕宵旰勤勞如傷在抱茲當翠華臨涖倍深軫卹用普均沾之澤以慰望幸之忱著將乾隆元年至乾隆十三年江蘇積欠地丁銀

二百二十八萬餘兩安徽積欠地丁銀三十萬五千
餘兩悉行蠲免俾官無詿誤民鮮追呼共享昇平之
福夫任土作貢歲有常經自應年清年款江蘇積欠
乃至二百二十餘萬之多催科不力有司實不能辭
其咎而疲玩成習豈民間風俗之澆漓尚有未盡革
歟朕以初次南巡故特加恩格外嗣後該地方官務
宜諄切勸諭加意整頓其在小民亦當前除舊習勉
効輸將勿謂曠典可希冀屢邀而惟正之供任其負逋

也其浙江一省雖額賦畧少於江蘇而節年以來並
無積欠豈犬牙相錯之地不齊乃至是歟此具見浙
省官民敬事急公之義而江蘇官民所宜懷慚而效
法者也朕甚喜焉著將本年應徵地丁錢糧蠲免三
十萬兩以示鼓勵各該督撫其仰體朕惠愛黎元之
意嚴飭所屬實力奉行又

諭曰朕上年巡幸嵩洛問俗省方清蹕所經已疊沛恩
膏彰行慶施惠之典而該省紳民踴躍急公就瞻恐

後其懽忭鼓舞之誠不惟無怨而益肥至今猶為繫念所宜再沛恩施者也其河南省乾隆十四年以前積欠帶徵緩徵錢糧三十五萬餘兩著再加恩概予蠲免俾該省小民催料不擾益宏樂利之休

是年兩淮竈戶乾隆二年至十四年甘肅元年至十年各逋賦皆

諭除之又以

駕幸木蘭經臨各州縣有被雹災者免今年田租十之

五餘免十之三

臣等謹案乾隆二十一年祭告闕里二十二年

幸江浙二十七年春

幸江浙秋

幸木蘭凡經臨之地分別蠲免皆準是年

諭旨行

十七年免長蘆鹽商逋課十四萬兩有奇

十九年恭謁

盛京

陵寢禮成免奉天今年田租戶部莊頭糧免萬石各旗地
米豆草免半壯丁米悉除之

二十一年

幸闕里免曲阜縣明年田租又以用兵西陲民勞輸輓
甘肅肅州涼州安西各衛臯蘭一縣今年賦銀米
芻悉予放除寧夏平涼鞏昌蘭州四府田租免十
之三全省乾隆十一年至十五年逋賦十年至十

五年所貸牛種皆勿收責

是年免齊齊哈爾黑龍江墨爾根呼蘭所貸種食
在本年以前者悉除之

二十二年

聖駕南巡

諭免江蘇安徽浙江本年以前逋賦並免江寧蘇州杭
州三府今年租其江南乾隆十年以前漕項兩淮
乾隆十七十八十九年竈賦浙江漕項屯餉沙地

公租及貸種未償各積逋悉予放除

是年免甘肅十六年至二十年逋賦並免甘州涼
州肅州安西臯蘭今年田租又免直隸滄州靜海
南皮並山東海豐縣各逋賦

二十三年免甘肅十六年至二十二年逋賦二十
四年免甘肅明年租西安州縣分三等免本年田
租有差其安西瓜州屯民二十二年所貸牛具悉
予放除

二十五年征西大兵凱旋免甘肅明年田租

二十六年

幸五臺

諭免山西經臨及

駐蹕之地今年租十之三其五臺縣乾隆二十四五年
所貸倉穀石樓陽曲二縣緩征帶征各銀穀皆勿收
責

是年免宣化府八年至十八年逋賦

二十七年

幸江浙

諭免

駐蹕之江寧蘇州杭州三府附郭諸縣今年田租其江
蘇安徽浙江免二十二年至二十六年災田緩征
及地丁之未入者如二十二年例行又免兩淮鹽
課帶征銀九千兩浙江民屯田租漕賦鹽課諸通
銀二十六萬四千兩各有奇

迴鑾又

諭曰朕巡省江浙畿輔所過地方應征額賦前已特頒恩旨分別蠲免但念各屬尚有節年民欠未完之項分年緩帶錢糧尚應按數征收茲迴鑾沿途體察民依宜敷恩澤著再加恩將乾隆十二年至二十五年大興靜海龍門宣化懷安萬全西寧懷來蔚州四旗等十州縣廳未完地糧銀七千一百餘兩改折銀六千六百餘兩屯糧一萬六千餘石概予豁免其自十

九年至二十五年各屬因災緩帶地糧銀八萬六千七百餘兩改折銀九千一百餘兩屯糧六萬三千餘石並著加恩於本年起限再分作三年帶徵俾民力益紓得資耕耨

三十一年

諭曰朕統御萬方孜孜求治惟以愛育黎元為念自御極以來蠲賜所逮不下千億萬乾隆十年曾恭依皇祖普免直省錢糧恩例蠲除天下額徵正賦二千八百

萬有奇惟歲運漕米向以供給俸餉廩糈之用非水旱特蠲例不普免恭閱

皇祖實錄康熙三十年

特頒恩旨將各省起運漕糧通行蠲免一週大澤均沾慶
逾常格仰惟

皇祖冲齡踐阼臨御之三十年春秋未及四十朕年二十
有五始登大寶膺祺受祉迄今亦閱三十年際

重熙累洽之會必世昌期均符泰運其為慶幸倍深茲荷

蒙

上天眷佑

列祖鴻庥函夏謐寧疆宇式闢北庭西域二萬餘里咸隸
版圖外有耕屯之獲內無餽餉之勞且連歲年穀順
成庶物豐殖京通倉儲儘有餘粟

天既誕貽樂歲惠洽昇平朕自當仰體
天心以推恩黎庶是用敬承

嘉貺懋繼

前謨使薄海億兆並裕倉箱之慶所有湖廣江西浙江江蘇安徽河南山東應輸漕米著照康熙年間之例以乾隆三十一年為始按年分省通行蠲免一次

戶部遵

旨議定乾隆三十一年免山東河南二省三十二年免江蘇省三十三年免江西省三十四年免浙江省三十五年免安徽省三十六年免湖南省三十七年免湖北省以次遞行蠲免

是年

上幸木蘭免所經地今年額賦十之三自後歲以為常

又

諭雲南近日莽匪滋擾其未經被擾之處一切派撥土

練修理橋梁急公踴躍免附近普洱之普藤猛旺

整董等十三土司本年額徵條編正耗及米折銀

三千餘兩正耗糧六百餘石並免猛籠一處宿逋

又

諭前經降旨將各省漕糧分年普免一次期使海宇黎元均霑闔澤但聞漕糧款內尚有例徵折色及民戶輸銀官為辦漕者雖徵收銀米不同其為按田起漕之例則一也著再申諭各省州縣內有徵折色者一體概令蠲免

三十二年

上巡幸天津免經過地方及天津府屬今年額賦十之三又普免天津府屬節年尾欠及上年緩征銀七

萬三千兩有奇屯谷三千四百餘石又卽年因灾
出借並舊欠及上年被水出借穀十三萬一千一百
餘石均予放除復以畿輔地方共切近光之募將直
隸通省各屬卽年尾欠未完地糧銀四萬九千五百
餘兩屯糧六萬六千四百餘石一體蠲免

又

諭各省督撫屆輪蠲漕米年分諭各業戶亦令佃戶免交
一半

是年以滇省緬匪滋擾軍務方殷免本年額賦其
大兵經過之地及永昌騰越普洱三府州全行蠲免
其餘亦免十之五又普免近邊各該土司本年額
賦明年

諭免亦如之

三十四年

諭免雲南辦理軍需地方及永昌騰越普洱三府州明
年額賦十之五並免直隸河南湖北湖南貴州等

省

大兵經過各州縣明年額賦十之三

三十五年

諭朕寅承丕緒撫有萬方中旦求衣無日不以勤恤民
依為念是以劬農省歲減賦逋征不靳多費帑金蘄
閭閻共臻康阜湖在乾隆十一年丙寅朕御宇周旬
肇敷闡澤曾恭依

皇祖普免天下錢糧恩例蠲除直省額徵正賦二千八百

萬兩有奇越在三十一年丙戌際當必世興仁益惟
比戶饒裕是計復下詔將應徵漕米省分照康熙年
例概蠲一次俾各倉箱盈衍倍積耕餘邇年以來寰
宇入寧民氣和樂惟

上天孚佑我邦家淳錫康年頌符綏屢朕祇膺

昊蒼鴻眷其可不究澤推仁以與我海內元元答茲

嘉貺我國家席全盛之模內外經費度支有盈無詘府庫
所貯月羨歲增因思天地止此生財之數不在上即

在下與其多聚左藏無寧使茅簷蔀屋自為流通
者仰紹

列祖貽庥化成熙洽為民藏富欣際斯辰且今年為朕六十誕辰明歲恭逢

聖母八旬萬壽普天懽祝慶洽頻年尤從來史冊所未有是宜更沛非常之恩以協

天心而彰國慶茲用乘春頒令誕布陽和著自乾隆三十五年為始將各省應徵錢糧通行蠲免一次其如何分

年遞蠲之處著大學士會同該部即速詳議具奏

又

諭乃者恭奉

皇太后安輿展謁

兩陵前已降旨蠲免所過地方十分之三茲蹕途所至小民扶老攜幼歡迎愛戴之忱特切朕心深為嘉悅著加恩將經過州縣及天津府屬所有乾隆三十一年至三十三年未完尾欠地糧銀共五萬一千八百餘

兩地糧項下本色穀豆共五千九百餘石又節年因
灾借穀共十二萬六千一百餘石普行蠲免又免直
隸通省未完尾欠地糧銀一千二百餘兩及應徵本
色尾欠穀豆二千八百餘石改折二千六百餘兩并
因灾緩徵銀十二萬四千九百餘兩穀豆八千二百
餘石改折銀一千二百餘兩一體蠲免

是年免甘肅臨邊各屬明年應徵番糧草束其河
東西屯糧草束免三之一又烏魯木齊新疆戶民

額徵屯糧草束

諭免亦如之

三十六年免福建臺灣府屬額徵供粟一十六萬
餘石并免廣東廣韶等府州屬官租及屯田曠軍
餘羨學租等項銀兩十分之一其四川征收米豆
雜糧并各廳營土司夷賦及本折貢馬一體蠲免
是年

上恭奉

皇太后安輿巡幸山東免直隸經行地方本年正賦十之

三復

念去歲天津等處被灾較重免滄州等五州縣借欠穀
三萬八千餘石及天津縣常借未完穀三千六百
餘石至經由之東安等四州縣借欠穀三萬八千餘
石及寶坻等五州縣欠穀一萬八千餘石均予蠲
免其順天府屬之武清一縣被灾尤重免十之五
又以便道詣謁闕里閭閻歡忭供役免上年歉收

地方正賦十之五復

諭泰安曲阜為

駐蹕之地除本年田租并免濟南各屬借欠穀四萬九千餘石東平所未完災緩地丁銀四千八百餘兩又災借麥本未完之濟南武定兩府屬五千八百餘兩兗州曹州等六府屬九萬八千餘兩全行蠲免

又

諭朕巡幸木蘭今歲雨水較大著加恩蠲免十分之五

三十七年免奉天錦州米豆額賦又免山西太原等
六府遼沁等八州及歸化城各協應徵本色米豆十
之三其大同朔平二府地處邊瘠全行蠲免并將口
外清水河廳米折銀兩免十之三其和林格爾等處
應輸折色銀兩一體全蠲至太僕寺牧廠地畝向係
本折兼徵其折色照地丁例全蠲本色亦免十分之
三

又免浙江溫台所屬玉環廳額徵祖穀二萬一千

餘石海寧縣天漲沙地租銀一千二百餘兩又以江南蘇州等屬積欠現在僅有尾欠五萬餘兩急公可嘉

特諭免之

是年又免陝西上年西安等九府州額徵本色併存留穀租糧及延安等三府州本色糧草其已經完納者准作本年額賦又免甘肅各廳州縣節年民欠倉糧三百七十六萬五千餘石

三十八年

諭朕此次巡幸淀津業將經過州縣未完民欠概予蠲免但念三十六年被災最重者二十四州縣其宛平等十五州縣積欠已在經過普免之列唯通州寶坻三河等九州縣非鑾輅經行所及僅免三十五年以前而其地多有經過各州縣界址毘連者此征彼免小民未免向隅著將此各州縣三十六年分未完緩帶地糧銀一萬五千六百六十兩三錢本色豆四百

八十一石九斗九合亦一併蠲免

是年免直隸霸州等七十五州縣廳節年灾借倉
糧二十三萬八百餘石屯糧項下米穀七千九百
石有奇

三十九年以川省自征勦金川以來羣黎踴躍奉
公其

大兵經行地方及未經辦差之九十廳州縣節年出
夫運糧分別差務繁簡多寡將乾隆三十九年以

前緩征錢糧蠲免有差其各土司夷民均屬奮勉出力並一體酌免貢馬夷賦

四十一年因金川平定祇謁

兩陵禮成恭奉

皇太后巡幸山東免沿途經行地方本年正賦十之三其通州三河等十三州縣廳及大興宛平等十五州縣并滄州交河節年緩帶灾借等項銀糧麥豆悉予放除又以畿南一帶其灾區之不值

蹕途者如霸州保定文安大城等二十州縣緩帶灾借
等項銀米亦概行蠲免

諭曰朕因雨金川蕩平祇奉

安輿恭詣

泰岱輦路所經加恩優渥而泰安曲阜為駐蹕之地
尤宜廣敷惠澤著將該二縣乾隆丙申年應納地丁
錢糧全行蠲免

免水陸經行之德州禹城等州縣衛歷年積欠其

蹕路未經之鄒平新城齊東陵縣二十一州縣衛灾借
等項銀穀悉行寬免又以入境以來小民夾道歡
迎倍覘親愛將德州壽張等十一州縣並臨清等
州縣緩徵漕項銀米悉
諭除之

四十二年恭奉

孝聖憲皇后梓宮詣

泰東陵安奉免沿途經過地方本年額賦十之五易州免

十之七

是年以福建臺灣府屬官莊租息現值輪蠲之年
照上屆例免十之三又陝西甘肅向有額徵糧草
例不入蠲均

特諭免之其河東西蠲免屯糧草束悉依上屆之例
四十三年

上恭謁

泰陵

泰東陵及三月清明節恭詣祭謁免經行地本年正賦十之三

諭曰遼瀋為我朝

鴻業肇基之地風俗敦龐人心淳厚茲由山海關至陪京

恭謁

祖陵蹕路所經村村殷阜老幼歡迎扶攜恐後嘉惠之餘恩施宜渥啟鑒日業經降旨免所過地方錢糧十分之三著再加恩將奉天所屬府州縣乾隆四十四年

地丁正項錢糧通行蠲免又將各庄頭本年倉糧
一萬餘石免其輸納其

盛京興京遼陽牛庄等十五處旗地應納芻糧亦免
徵一半

又

諭曰各省漕糧于乾隆三十一年普免一次茲蒙

昊蒼眷佑累洽重熙敬體

天心愛養億兆用是再沛恩膏著于庚子年為始復行普

免天下漕糧一次俾藏富于民共享盈寧之福交戶部詳悉妥議具奏

四十四年

諭朕此次敬謁

秦陵恭祭

秦東陵及四月釋服恭詣祭謁所有沿途經過地方著加恩蠲免本年地丁錢糧十分之三

免湖南乾州鳳凰永綏三廳及城步綏寧二縣苗

糧照三十五年例

又

諭戶部議覆富勒渾等奏銷川省軍需項下分別民欠商欠專賠分賠各款一摺其中如民欠一款念辦理金川軍務買糧運餉悉發官帑絲毫不以累民而川省百姓輓輸負送各出其力今于大功告藏之後復令償還前借帑項朕心實所不忍所有該省民欠津貼及採買站夫口糧共銀一百九十六萬八千四百餘

兩均著加恩豁免再商欠一項未完米價腳價銀九十八萬六千九百餘兩雖有虧缺實情並非侵蝕其實在家產盡絕無可著追者並著加恩一體豁免又報銷項下與例案不符各款請分別專賠分賠于通省文職內按年在養廉內扣半賠補等語因思平定金川之事費帑六千餘萬兩期使番民永除後患何必以此難于報銷之案累及各官所有專賠分賠銀二百八十三萬二千餘兩糧米十五萬三千六百餘

石及代賠無着一半商欠應扣通省一半養廉并富勒渾與陞調別省各員應扣一半養廉俱著加恩一併豁免

是年免陝西延榆綏三府州屬民欠常平倉糧十二萬三千石社倉糧一萬三千石各有奇

四十五年

聖駕南巡免經過直隸山東省本年正賦十之三又免直隸順德廣平大名天津四府屬積年灾借穀八

萬四千石銀九萬八千兩各有奇併免山東歷城等二十一州縣緩徵銀十三萬四千兩臨清等七州縣緩徵穀二萬六千石社穀二千四百石麥種合穀三千二百石各有奇

免江浙水陸經行地方本年額賦十之三

又

諭江省為財賦重地茲入疆伊始渥澤宜覃將江寧屬乾隆四十四年以前積欠銀四十五萬二千兩米十

七萬二千石蘇州屬未完銀二萬三千兩米十二萬九千石安徽屬未完銀四十萬七百兩米麥穀九萬七千石各有奇俱一體全行蠲免又以兩淮竈戶僻處海濱生計艱苦其各場歷年未完銀三萬五千餘兩悉予豁免

又

諭曰朕巡幸江浙取道淮揚兩淮商衆踴躍抒忱並應一體加恩所有應還川餉項內尚有未繳銀一百二

十萬兩全行豁免又以江寧蘇州杭州為省會

駐蹕之地并附郭諸縣本年額賦悉除之

是年福建臺灣府屬額徵供粟山西太原等十六府州并清水河廳太僕寺牧廠和林格爾等處本折糧銀廣東廣韶等府州屬應徵各項銀穀以輪遇普蠲之年悉照上屆例分別蠲免有差

四十六年

上幸五臺免經過直隸山西各州縣本年正賦十之三

又免五臺縣未完借穀三千六百石有奇其順天
保定等府州縣屬未完穀四萬七千石米三萬四
千石麥三千四百石銀五萬一千八百兩各有奇
並免之

是年以江蘇河灘地租欠項遞年積壓

特諭免之又以甘肅靖遠安定等七縣今歲承辦軍需
民情踴躍將本年額徵銀糧免半輸納

四十七年

上幸盤山免經過地方本年正賦十之三

又

諭曰淮南商人應繳提引餘利銀兩前經降旨加恩將未完銀展緩分作二十一限繳完今該商等已完至第十三限其餘八限尚應繳銀三百八十六萬六千餘兩此項提引餘利獎由高恒而起該商等按限完交已經過半朕思恤商即所以恤民著加恩于未完銀內豁免二百萬兩其餘仍按原限完繳

四十八年

上恭謁

秦陵免經過地方本年額賦十分之三

諭曰豫省自辦大工以來歷次部撥及動用司庫銀千餘萬兩無非為百姓保護田廬所有採辦料物雇募人夫俱於例價之外寬裕給值俾小民踴躍趨事其例價外酌增銀兩自應分年均攤帶徵還款但此次為數甚多而上次漫工案內又尚有攤徵未完銀九

十餘萬兩若按年帶徵民力未免拮据朕自御極以來普免天下地丁錢糧者三次普免各省漕糧者二次不惜萬萬帑金又何靳此千餘萬庫項而令小民每年於正賦之外多此徵輸耶所有此次所請分年攤徵銀九百四十五萬三千九百二十餘兩以及上次攤徵未完銀九十四萬五千餘兩俱著加恩普行豁免復以南岸開挑新河考城商邱以下係山東曹縣地方查明東省挑河例價外酌增夫工各項銀共

二十二萬餘兩俱予放除又甘肅積年未完銀二十四萬六千兩有奇糧一百三十八萬九千石有奇分年帶徵仍不免追呼之擾特

旨免之

是年

上臨幸

盛京恭謁

祖陵免奉天所屬府州縣正賦其各庄頭及旗地應納芻

糧照四十三年例寬免

四十九年

上幸江浙免直隸山東經行地本年額賦十之三又免
順天保定等十二府州屬未完穀十五萬五千餘
石並免山東利津霑化等二十一州縣衛災借籽
種牛具銀十一萬八千餘兩穀十萬一千餘石

又

諭將江寧所屬積欠地丁漕項銀三十六萬七千兩民

借未完銀十五萬一千九百兩米麥豆十八萬九千石各有奇蘇州所屬地丁等項銀四萬五百兩民借銀一千二百兩漕項等款未完米豆三萬八千石各有奇安徽所屬地丁等項銀三十七萬三千兩民借六萬一千兩漕倉等項銀八萬三千兩漕糧等款米麥豆六萬五千石各有奇全行蠲免

又免江浙省會

駐蹕之地附郭諸縣本年額賦其杭州嘉興湖州三府

屬本年應徵地丁錢糧共一百九萬餘兩免十分之三

又

諭甘肅逆回滋事一切輓運糧草有需民力除今年田租其業經徵收者作明年正賦又免自乾隆三十八年至四十六年壓欠銀一百六十餘萬并免民欠存留項下銀五萬一千餘兩糧二萬五千餘石民番未完草束價銀二十萬四千餘兩又歷年民欠耗羨銀

一十萬二千餘兩糧四十五萬二千餘石一體放除
五十年

上幸盤山免經行地方今年正賦十之三

右賜復

免科

順治元年除明季加派三餉及召買津糧

三年除直隸任邱縣水淹地租

四年除江南淮徐無主荒地租有主者量免額賦

三年漕米一年

七年免湖廣蘄州麻城羅田蘄水黃梅黃岡六縣
五年六年荒田額賦

八年除山西荒田賦二萬八千四百九十頃西安
新荒民屯廢藩地賦並虛限丁銀三萬七千三百
九十兩糧千二百八十石各有奇

是年除直隸安州芝蔴棉折徵額賦

九年除陝西莊浪西寧肅州故絕拋荒水淹沙壓

各地賦

十一年減江西瑞州袁州二府浮糧

康熙元年除江南海州移內地民所遺海濱田租
二年除廣東福建海濱無主田租

九年除邳州海州宿遷沐陽通州泰州坍沒田租
十年除河南陝州江南靈璧臨淮各包荒古荒租
賦

是年定各官詐報墾荒致民賠累者准勘明豁免

又定蠲除漕糧并隨漕銀米亦准蠲

十三年除江南丹徒金壇江濱坍沒田租

二十一年定築提佔用民田其漕糧奏除

二十六年

恩詔除康熙十三年以後加增雜稅

二十七年除江南丹徒縣海濱地康熙十八年以

後坍沒田租

二十九年

諭朕近見廣東高州瓊州等府所屬州縣地丁各項錢糧
累年每致逋欠如果丁闕地荒不能輸納著該督撫將
實繫戶口稀少田租荒蕪徭賦無從辦納州縣積年所
欠錢糧數目詳晰察明具奏議除廣東高州府吳川縣瓊
州府臨高澄邁二縣自十八年至二十八年未完地丁
銀十有二萬八千六百兩米四千六百石各有奇

三十年除江南睢寧縣廢闕地丁額賦其本年以
前逋者並勿收責又除通州海門鄉冊田銀四百

九十二兩米麥百十二石

三十一年除雲南鄧川州水石冲壓荒田額賦

三十四年除山西津榮二縣河壩坍沒田租

三十八年除浙江鄞縣海潮冲沒田租凡千有七

十餘畝

三十九年除鄞縣坍沒田租

臣等謹按鄞縣十一都三圖近海田地舊有塘牯
禦潮蓄水自順治十七年衝沒田淹租缺至是乃

豁除

四十九年除江南荒地銀

五十二年除江蘇荒地銀

五十三年除浙江奉化縣水浸田租

六十一年

諭曰閬陝西甘肅二屬各州縣衛所地丁銀每錢額外徵收三釐米每斗額外徵收三合以為備荒之用此項徒有加賦之名而無賑濟之實著自雍正元年為始將額外徵

收銀米永行停止如有舊欠亦悉予豁免

又

諭京師琉璃瓦兩廠官地每月按間計標徵租相沿已久朕念兩廠多繫流寓僑住揭本經營之民情可憫惻嗣後止徵地租免其按間計標逐月輪輸

雍正二年除浙江仁和等十一州縣水衝沙壓地租又除江西南昌新建豐城進賢奉新寧靖安七州縣浮糧

三年怡親王允祥奏減蘇松浮糧奉

上諭蘇松之浮糧向日部臣從未陳奏常厯

皇考聖懷本欲施恩裁減朕仰體

皇考愛民寬賦之盛心將蘇州府額徵銀豁免三十萬兩
松江府額徵銀豁免十五萬兩著為定例俾黎民輕其
賦稅官吏易於催科可飭令地方官知之

是年除江南丹徒縣濱江坍沒田租凡百八十一
頃二十三畝有奇又免臺灣鳳山縣番婦口賦

金史紀事本末卷之八
卷之八
臣等謹按鳳山縣八社額徵丁賦番婦每口徵穀
二石今以雍正三年為斷計八社番婦一千八百
四十四口折納穀三千六百八十石自雍正四年
為始准此徵收免其計口納賦

五年

諭各省之中賦稅最多者莫如江南之蘇松二府浙江之
嘉湖二府考四府賦稅加重之由蓋始於明初籍富民
之田以為官田按私租以為正賦此洪武之刻政也明

二百餘年減復不一我朝定鼎以來仍照明例徵收蓋因陸續辦理軍需經費所在未便遽然裁減

皇考聖祖仁皇帝常論及此雍正三年朕仰體

皇考聖心已將蘇松二府額徵浮糧豁免今特沛恩膏將嘉興府額徵銀四十七萬二千九百餘兩著減十分之一計免銀四萬七千二百九十餘兩湖州府額徵銀三十九萬九千九百餘兩著減十分之一計免銀三萬九千九百九十餘兩共二府免銀八萬七千二百八十餘

兩永著為例

六年除陝西西鄉縣康熙六十一年浮糧銀千二百三十九兩九錢有奇

七年

諭除湖南武陵縣宿郎堰湖濱淹田額賦

八年湖南永順土司改土歸流照原額秋糧分則

新科仍免科一年

九年

諭曰朕聞淮安府阜寧縣屬射陽湖地方于雍正五年題升淤地八千一百餘頃升租銀四千餘兩又康熙五十九年丈量射陽湖北岸灘地案內升四百餘頃應升銀一百七十兩皆係有銀無地小民賠累難堪向來積欠累累從未清完甚屬累民著將前項升地八千六百五十頃四十九畝零租銀四千二百六十一兩有奇悉行豁免以甦民困

又江南開河築堤占廢之民屯田陝西武功縣之

冊沒田福建寧洋縣無徵鐵稅鳳山縣莊地關額
賦銀悲予免科

十三年

皇上登極

恩詔蘇松前已蒙

世宗憲皇帝諭旨裁免四十五萬兩以紓民力但江省糧
額尚有浮多之處著再加恩免額徵銀二十萬兩

乾隆元年

諭江蘇淮安府屬之桃源縣徐州府屬之宿遷縣睢寧縣沿河地畝淹涸靡常雍正五年涸出睢寧縣報升地五千三十九頃宿遷縣報升地四千七十二頃桃源縣報升地三千八百四十二頃嗣蒙

世宗憲皇帝以淤地勘報不實令河臣會同督臣委官察勘共豁地七千二百餘頃萬民感頌存地五千七百餘頃照各縣成例折算實地三千五百餘頃科則亦經減輕其淮安一衛裁汰改歸州縣徵收乃比年以

來仍催徵不前蓋此淤出之地即舊有糧田是以民
力維艱輸將不繼也朕既洞悉其中情事自當加恩
開除以紓民力著將宿遷睢寧桃源三縣見存新淤
涸後改科地糧額徵銀六千五百四兩全行豁免其
雍正十三年淤地未完錢糧亦免徵收至水沈地畝
仍照例每年冬勘

是年江南泗州安河兩岸淤地甘肅狄道縣山東
鄒城縣二十八州縣河南祥符等四十二州縣荒

田又山東章邱縣詐報墾荒各賦悉令除免

定新設湖北鶴峯州長樂縣雍正十二年至乾隆元年免其升科

臣等謹按鶴峯長樂本容羨土司地自雍正十二年改土歸流至是奏報起科得

旨照容羨原徵秋糧之數為額仍免三年至明年起科
二年

諭江蘇阜寧鹽城二縣有濱河地畝淹涸靡定有司誤

報升科小民納賦甚覺艱難著該督撫確核地畝額徵銀數悉行豁免其從前未完之舊欠一併赦除

是年江南高郵等五州縣河堤民防祖湖北沔陽州未經清丈田雍正十三年乾隆元年逋賦山東商河縣釀地賦甘肅河西各州縣衛所隨徵馬糧悉予免除

三年除四川射洪等六縣坍沒田租

四年

諭雲南勲莊變價一案尚欠銀千八百二十九兩有奇
此項田屢被水冲沙壓難以耕種承變各戶逃散無
可著追頗為地方之累著將應徵銀准予豁免

是年西安同州鳳翔三府水衝屯莊銀米悉予除
免

五年除河南中牟封邱等十四州縣水冲沙壓各
荒地額賦並除鄭州地戶積逋

六年除湖南湘鄉臨武二縣坍荒田租

七年除浙江錢塘縣及河南洧川等十一州縣河
坍沙壓荒田額賦

八年

諭曰朕聞浙江溫台二洋為漁船採捕之所從前玉環
未經展復以前凡漁船被汛兵需索陋規無異私稅
後因展復玉環地方官恐經費無出遂將陋規改收
塗稅此一時權宜之計也朕思濱海編氓以海為田
每歲出沒於波濤之中捕漁糊口生計淡薄應加軫

恤著將此項永遠革除免致不肖官弁丁役苛刻需索擾累貧民

是年除湖北興國黃岡二州縣荒田租

九年四川水被決田一百九十六頃二十四畝有奇衝沒碾榨磨共十有九座並除其租課

十年除江西樂平德興玉山宜黃陝西郃陽各坍荒田租

十年除江蘇城租初居民沿城構屋賃地輸租後

屋毀他徙租遂逋懸州縣率以罰鍰抵解至是禁
濫罰始奏除之

是年

諭減直隸慶雲縣額賦十之三著為令又浙江雲和縣
坑鑪稅廣東瓊州府雜稅福建無著漁課悉予免
科

十二年免直隸天津葦漁課

十六年

諭曰朕聞常州府屬之武進陽湖二縣開抵役田租銀一項原係前明時虛田領價後因本戶逃亡株連親族各將已產開抵實非前明原置之田亦非當日領價之戶小民條糧後租力難並輸以致積年拖欠朕省方所至民隱勤求清問既周倍深軫念著將武進陽湖二縣開抵役田除應辦條漕仍照民田一例完納外其新舊租銀概予豁免以除民累

是年除浙江淳安臨海瑞安陝西吳堡各縣坍荒

田租

十七年除甘肅狄道等十五州縣坍荒田租

十八年浙江山東竈地安徽太平縣福建臺灣府
及直隸四旗通判熱河八溝同知所轄田地其坍
荒者免科

二十年

諭諸羅縣民陳天松等係海外窮黎墾荒追罰與抗欠
額賦不同且歷年久遠上年臺屬又被災傷情殊可

憫所有未完罰粟及折價銀兩著加恩即予豁免

二十二年

上念山東海豐縣東北鄉黎敬等五莊低窪易澇

諭勘改下則徵收

二十九年免湖北漢陽縣積年坍田租凡五百五

十頃六十畝有奇

三十一年

諭曰滇省山多田少水陸可耕之地俱經墾闢無餘惟

山麓河濱尚有曠土向令邊民墾種以供口食而定
例山頭地角在三畝以上者照旱田十年之例水濱
河尾在二畝以上者照水田六年之例陞科第念此
等零星地土本與平原沃壤不同倘地方官經理不
善一切丈量查勘胥吏恐不免從中滋擾嗣後滇省
地頭地角水濱河尾俱著聽民耕種概免陞科以杜
分別查勘之累

又湖廣漢川縣汭汭地勢低窪每多水患將汭

內上八總民田紅糧三則均改為漁糧上則徵收其
均田科則改為漁糧下則徵收至下八總民地內
應徵南米照上八總南米一併減免

三十六年除臨清及陵縣沙壓鹽鹺地畝租賦及
江蘇江寧震澤清河坍荒田租具泰州坍荒田畝
民逋悉除之

是年除江西袁贛饒建各衛所水冲沙壓屯田糧
又直隸喀喇河屯廳所屬被水糧地并巴里坤墾

不成熟地六千三百畝俱予免科

三十七年湖北江陵縣直隸永定河下口江蘇宿
遷縣各修築月堤占廢田租並予豁免其水冲沙
壓之江蘇靖江縣屬十頃二十八畝有奇甘肅中
衛縣屬一千九百九十四畝陝西興平縣屬二十
三頃五十二畝又邵陽縣屬五十餘頃一體免徵
三十八年直隸文安大窪連絡四淀向來漲涸靡
常

上念各業戶所有地畝積水佔田糧無所出雖水小時
尚可佃漁覓利究不若力田收穫之多嗣後視積
水之多寡以定賦糧之等差水大則全行蠲除水
小量行減賦

是年山西豐鎮廳屬旗地五百六十頃二十畝直
隸涿州民地九十七畝浙江仁和場蕩地五千三
百畝有奇均被水冲坍又湖北監利縣創築月堤
佔墾田畝六十三頃有奇悉予免租

三十九年免浙江錢塘桐廬餘杭臨安烏程各縣屬及江蘇上元江寧清河六合上海江浦震澤銅山常熟各縣屬坍荒及築堤壓佔田賦又除直隸懷柔縣屬江西新昌寧都等五州縣屬冲坍田畝額租

四十年甘肅朔寧縣屬沙壓地一千三百餘畝應徵芻糧永行豁除又免山丹縣草湖等渠坍沒地七十七頃一十三畝田租

是年湖北監利縣築堤挖壓之軍屯田江蘇江寧鎮洋丹徒各縣屬坍沒占廢田均予免科

四十一年除福建建陽臺灣縣屬江西新淦新城縣屬江蘇桃源浙江仁和等縣屬冲坍田地租賦又免江蘇丹徒縣坍廢田地漕米四百四十九石有奇

四十二年免直隸喀喇河屯水冲沙壓地畝租賦四十三年除江蘇常熟婁縣嘉定長洲坍沒田租

及浙江仁和場三江場被潮坍沒竈課

四十四年除江蘇沿江坍沒田租及常熟嘉定所屬
坍沒田地漕賦并免甘肅高臺縣水冲沙壓地畝
額徵

四十五年

諭阿桂所奏修復馬港河西堤殘缺之處及接築無堤
處所聯至北潮河西岸民堰以禦倒漾自應如此辦
理其二套以下由北潮河入海之處既係路捷勢順

設遇漫溢正可分洩盛漲俾尾閭益得暢達轉可不
必添建閘壩雲梯關以外原不必與水爭地今二套
以下既為分洩盛漲之道則馬港河堤東灘地即不
能保無漫溢其應徵減則地畝錢糧著交薩載等查
明奏請加恩豁免

是年免河南孟津縣坍沒田租并甘肅平番碾伯
二縣被水沖沒地畝應徵芻糧永行豁免以免民
累

四十七年浙江仁和場仁和倉三圍等處坍沒存
減則地九百二十畝有奇自乾隆四十五年為始
令予豁免

四十八年浙江仁和場扶基等處糧地續被坍沒
又直隸懷柔縣水冲地畝均予豁免額賦

四十九年

諭蘇州藩司所屬地丁漕項公田餘租等款積欠銀糧
業經概予蠲除因思吳縣公田已與民田一律交納

條銀漕米並加徵義租嗣因該縣有積年無著田糧復于公田徵收餘租米二千二百餘石抵補無著虛糧七百餘石外尚餘米一千四百餘石留為該縣地方公用歷年均有拖欠民力拮据所有該縣無著田糧除照舊于此項餘租徵收抵補外其留備地方公用應徵米一千四百餘石著永免徵收

五十年免河南鄭州水冲堤壓廢地租賦

右免科

免役

順治元年除各旗莊丁差徭其糧草布疋亦永停

輸納

二年除江南丹徒丹陽二縣明末加派馬折銀

三年除浙江錢塘仁和縣間架房稅

七年除江南桐城潛山太湖宿松休寧句容六縣

逃丁額賦

十一月除江西逃丁額賦

十八年准江南江都如臯海州民能修理烽墩馬路者各免一年差徭

康熙十二年除河南僉派河夫

十六年禁有司罰民修築城樓垛口

三十三年

聖祖仁皇帝南巡免山東江南經行各州縣衛所丁銀

三十八年除江寧市廛歲輸房號廊鈔銀

五十二年

恩詔嗣後編審增益人丁止將滋生實數奏聞其徵收辦糧但據五十年丁冊定為常額永不加賦

五十四年定社倉捐穀免徭之例富民能捐穀五石者免本身一年雜派差徭有多捐一倍二倍者照數按年遞免

雍正二年禁官司科派大小文武官到任其屬官或吏役均不得科派兵民供具或官司指稱修署借端派累兵民者文照科歛武照剋扣律各坐罪

如上司官徇庇或勒令屬員修署供具者均論如律又定官署遇有所需用物照市價工給時直不得科歛違者論

六年覈天下丁銀實數盡勻入地糧徵收永罷口率之賦

八年

諭新設永順一府所屬永順龍山保靖桑植四縣火坑鋤頭煙戶等名色錢一概刪除令該戶自行開報開墾地

方官給以印照永為世業

十三年

皇上登極

諭山西大同偏關老營水泉三汛兵丁交納徭銀向在餉銀內扣交每年徵銀六百八十兩有奇著自乾隆元年為始將此項蠲除永著為例

是年除江西太平縣江夫河蓬雜賦

乾隆元年甘肅地震缺額丁賦湖北未經攤減丁

賦福建南平縣浮多丁賦江南網戶鱖魚折色銀
陝西坍地徭銀悉予免科

五年

諭曰朕聞江省歲額錢糧地丁漕項蘆課雜稅之外又
有名為雜辦者不在地丁項下編徵仍入地丁項下
彙入分數奏銷款目甚多沿自前明迄今賦役全書
止編應解之數未開載出辦原委即有開載出辦之
處亦未編定如何徵收則例於是有關額累官者有

徵收累民者有累在官而因以及民者有累在民而因以及官者朕心軫念特頒諭旨除有款可徵無累官民之項仍照舊徵解但須覈明則例立定章程明白曉示以杜浮收隱漏等弊其實在闕額有累官民者著督撫確勘請旨豁免

十一年除江蘇雜辦各賦江蘇雜辦錢糧有城租吏養班餘米軍餉碾餉折穀等項均係有款無徵與五年原奉

諭旨相符至是奏明准以十一年為始悉予豁免

又

諭曰從前朕巡幸直隸地方見城垣多有殘缺皆因不能隨時堵築以致出入踐踏踰越成路因令大學士等寄諭各督撫令其督率有司留心整飭嗣據巡撫碩色奏請分別工程一千兩以上者俟以工代賑之年動項興修一千兩以內者令該州縣分年修補除土方小工酌用民力外其餘即于工費項下支修朕

將伊摺令各督撫閱看俾其仿照辦理但須善為經紀勿致累民而各督撫中遂有因此奏請開捐土方並將各官養廉合力捐修者或經批示或經議駁俱未准行今鄂彌達覆奏摺內又稱按田起夫誠恐佔田之戶必派之佃田之家不若暫借稅銀生息以脩修補等語此奏甚屬錯誤全不知朕本意矣蓋城垣為國家保障其責全在地方官員其所以酌用民力者蓋因各處城垣偶有坍塌地方官並不查禁任民

踐踏甚且附近居民竟將城磚竊取以供私用是以
令于農隙之際酌用本地方民夫補葺使民知城垣
之設原以衛民已身曾用力于其間則遇有坍塌自
然護息不肯任意踐踏且隨時修補亦易為力此上
下相維之義並非令其按田起夫竟成賦額之外增
一力役之征也如鄂彌達摺內所稱者恐各省督撫
亦錯會朕旨或致辦理未善致有累民之處用是特
頒此旨曉諭各督撫知之

二十七年令生監不得濫充社長圩長牙行埠頭
各項雜役

三十七年

諭李瀚奏請停編審造冊所見甚是編審人丁舊例原
因生齒繁滋恐有漏戶避差之弊是以每屆五年查
編造冊以備考核今丁銀既皆攤入地糧而滋生人
戶又欽遵康熙五十二年

皇祖恩旨永不加賦則五年編審不過沿襲虛文無裨實

政況各省民穀細數俱經該督撫于年底專摺奏報
戶部核實具題是戶口之歲增繁盛俱可按籍而稽
更無藉五年一次之另行查辦嗣後編審之例著永
行停止

三十八年


諭今年七月間據陳輝祖奏請將該省民屯新墾丁銀
隨年攤徵批交該部議奏旋經戶部覆准並請行查
各督撫就本省情形酌籌妥議具奏嗣據直隸等省

陸續議奏大概請仍舊制者居多則陳輝祖所奏及該部所議皆未為得當國家承平休養百有餘年間閭生齒日繁歲有增益向來編審人丁按丁科則自康熙五十二年我

皇祖特頒恩詔永不加賦即以是年丁糧之數作為定額朕臨御以來無時不以愛養斯民為念詎肯于丁糧區區毫末之賦稍存計較乎若以新墾民屯地畝復將丁銀隨年攤納是與小民較及錙銖尤非惠下恤

民之道所有各省辦理丁糧一事無論已未覆奏俱著悉仍其舊毋庸另議更張其湖北長蘆二處已經該部覆准者亦不必行仍令照舊辦理

右免役



皇朝文獻通考卷四十四